


0
1cm
2
3
4
5
6
7
8
9
10
11
12
13
14
15
16
17
18
19
20
21
22
23
24
25
26
27
28



浙江圖書館



浙江圖書館



浙江圖書館



浙江圖書館

皇明名臣琬琰錄卷之五



禮部尚書崔公傳

禮部尚書陳公傳

敬齋李公墓表

禮部尚書呂公神道碑

忠安胡公神道碑

禮部尚書楊公傳

禮部尚書石公墓誌銘

康靖鄒公神道碑

浙江圖書館

瑯琊 王世貞續編



楊士奇

楊榮

李賢

王鏊

劉定之

徐溥

文安周公神道碑

徐溥

東谷徐公墓誌銘

張昇

文穆傅公墓誌銘

李東陽

文端周公神道碑

李東陽

石城李公墓誌銘

馮蘭

文毅傅公神道碑

文簡毛公行狀

邵寶

禮部尚書黃公行狀

李一瀚

文通費公神道碑

嚴嵩

文莊歐陽公神道碑

徐階

浙江圖書館

嘉議大夫禮部尚書藁城崔公傳

豐城雷禮撰

崔亮藁城人洪武元年授中書禮曹主事遷濟南知府以
母憂起復為禮部尚書祭未詔定官員親屬冠服之禮亮
於內外官員父兄伯叔子孫弟姪及隸卒軍士等制各定
有差三年上諭亮曰司天臺言朔日以來日中有墨子占
者多以為祭天不順禮所致令亮制之亮引周漢唐宋及
元損益不同復以我國朝前議圜兵從祀之禮以漢唐為
煩故止祀日月星辰太歲為簡當上然之而止復問郊祀
天地邦位皆正中而百官朝參則列東西避正中何也亮

劉以天子祭天升自午陞祭社升自子陞蓋社主陰陰北方也故君南向答陰之義也郊主陽陽南方也故君北向以答陽也若群臣朝參無答神之義俱當避君上之尊故升降則皆由郊陞朝班則分列東西以避馳道此其義不同上由是益重亮因命百司朝參左右班不得越三尺省府臺公俱就拜甬道上腹承命百官議及內史監官於皇太子親王前稱殿下自稱名若本宮內史本府官及承奉司于皇太子親王前俱稱殿下自稱臣百官在上前稱皇太子稱親王曰某王又定大朝會常朝及內外官員辭謝奏事侍班等禮付侍儀司行之拜定皇太子以下及群臣

賜生殿上坐墩墩制黍酌宋典各為等差其他請旗纛止
祭于當祭之月與夫宗廟四時之祭皆用四時孟月及歲
除凡五祭于清明等節各備時物薦享俱允行之時禮儀
草創而亮引正考據多本經典云

浙江圖書館

浙江



浙江圖書館

禮部尚書陳公傳

鄭曉撰

陳公迪字景道宣城人曾祖巨卿元江州路總管祖宥賢
國初從征有功調撫州守禦百戶因家焉父仲康嗣百戶
迪幼倜儻有志操洪武八年薦辟為郡學訓導嘗為郡草
萬壽賀表上覽而異之十二年近臣薦召為翰林編脩
十八年陞侍講預脩大典二十四年陞山東左叅政捕蝗
拜盜民德之二十七年內艱二十八陞雲南右布政使
時普定曲靖烏撒烏蒙諸夷煽亂公率土兵擊破之捷聞
賜金幣三十一年建文君即位改官制定六部一品免尚

書鄭沂等徵公為禮部尚書建文二年知貢舉是年水旱
有旨集議公言刑獄未清宜勅法司擇公蘆仁厚者分詣
郡縣審覈獄囚無令久淹致傷和氣又言逃民家業既喪
且畏公私逋負失今不卹必嘯聚為患宜使有司招徠其
不願歸者聽附籍種田暫免差役則民安而盜息矣皆從
之三年加太子少保辭兼俸請難兵起與黃子澄等上疏
陳大計公受命督軍儲於外過家未嘗入聞變即赴京師
文皇繼統召公責問公慢罵不屈與子鳳山丹山等六人
同日就戮將刑鳳山呼曰父累我公叱勿言罵不絕口割
鳳山等鼻舌熬熟食公公吐唾益指斥遂俱凌遲死既死

人于衣帶中得詩有曰三受天王顧命新山河帶礪此絲
綸千秋公論明於日照徹區區不戴心又有五噫詞並悲
烈蒼頭侯來保者拾其遺骸歸塋縣計家橋洪熙初詔釋
公宗姻戍邊者還鄉給產業成化壬寅郡人祀諸鄉賢祠
甲辰郡守涂觀復於公故居立祠祀之後湮廢嘉靖乙未
驗封郎中李默請判寧國復置祠祀郡人私謚曰靖獻默
文學才行表著一時仕至吏部尚書兼翰林學士丙辰春
為趙文所誣逮詔獄卒

浙

浙江圖書館



浙江圖書館

資善大夫禮部尚書兼左春坊學士敬齋李公墓

表

廬陵楊士奇撰

李氏之先出唐宗室燉煌房五代時避地于越後之台之

寧海家焉見黃文獻公集中零峰先生墓誌零峰先生當

宋末元興之際以高文邃學重於時文獻蓋其考試浙省

時門生云零峰於興化為高祖曾祖諱栗祖諱炳考諱熟

明詩書春秋洪武初分教華亭縣因家焉後為鄞州同學

知卒於官歸塋華亭娶華亭沈氏興化其子也諱銅字至

剛號敬齋以字行少穎敏不群嘗從學楊庶夫為詩文有

清思洪武戊辰舉明經奉命侍懿文太子初授祠部試郎

中既實授坐累請戍邊無幾召還為虞部郎中尋陞河南
布政司右叅議會河決汴隄居民危懼公建議假王府積
木作茂濟之人賴全活甚衆調湖廣布政司左叅議大宗
文皇帝入正大統公來朝大臣有言其才且洪武舊人遂
以為通政司右通政方脩洪武實錄公與焉且莫在上左
右道說洪武中事甚親密是冬陞禮部尚書時禮部之務
叢挫公長於剗繁條理井然益見寵遇實錄成有白金文
幣金織衣之賜永樂二年春冊立皇太子命公以尚書兼
左春坊大學士東宮開筵造公與右春坊大學士解縉最
先進講及脩永樂大典四方文儒皆集仍以公董之無幾

為侍郎宋禮所間見疏歲餘降儀制郎中然遇劇務必以
屬公解縉素厚公既遭讒出又以公言其怨望後召下獄
而并下公入廟嗣位念公舊宮臣復以為通政數月又念
其老不任期叅改知興化府時朝廷方儒仁澤於天下公
仰祇德意勞心撫綏郡民德之甫再歲歿于官宣德丁未
七月四日也享年七十娶孫克配君子男二長子瀛次源
永樂甲辰進士疏通明敏自驗封主事陞員外郎方嚮用
於時嘗得推恩追賜父誥命及賜母恭人女四長嫁盛衍
次嫁太常少卿鄭雍言次嫁王瑄次嫁考功主事宋琰雍
言皆進士發身孫男八女三曾孫男一鳴呼公歷事四聖

凡四十年入典邦禮輔儲君出佐藩翰守名郡顯榮光大
矣雖間歷夷嶮然回眎同儕輦覆敗消亡何可勝計雖或
存什一於千百而求如公之巋然享高壽都重爵從容考
終何其少哉况又後嗣之卓然奮起而繼承之謂非所有
存之良所施之厚有以致之乎余與公同朝久淳既請少
保楊公銘公之墓又請余表於是乎言

榮祿大夫太子太保行在禮部尚書臨潼呂公神道

碑

震

建安楊榮撰

國家當文明熙洽之運海內八安四方無事則必有英偉
魁傑之臣協心輔治以底垂拱無為之化誠非偶然也故
榮祿大夫太子太保兼禮部尚書呂公蓋其人焉公諱震
字克聲陝西臨潼人曾祖仲良祖敬甫父子鄴以貴公推
恩贈皆如公之秩曾祖妣蔚氏祖妣張氏皆贈夫人妣盍
氏封太夫人公生至正乙巳某年某日自幼穎悟日誦萬
言輒記憶終身不忘里中稱為神童年十五選補縣學生
二十以明經領鄉薦入太學蓋以聰敏聞方是時朝廷欲

稽郡邑壤地之廣狹貢賦之之多寡命有司具圖以進使
賦役適均姦弊無隱公承檄往兩浙督之民不勞而事集
既還京師遂拜山西按察司僉事繼入為戶部主事尋復
出為此平按察司僉事所歷皆有治聲太師文皇帝在潛
邸將舉兵靖難公知天命有在夙夜匪懈竭效勞員內難
既平召為大理少卿尋陞大理卿遂拜刑部尚書皆克盡
厥職維遷禮部重二十年凡禮樂制度效廟祠祭燕享錫
賚朝覲會同之事莫不參酌古今以時舉行時論稱之太
夫人家居年耄每形於憂念於是得承命歸省者三皆有
白金文綺之賜朝野榮之公之歸也凡兩值開中飢即命

所司出粟以賑之暨還條列以聞上是之人咸以為得大
臣體仁宗皇帝即位優遇隆渥恩禮有加嘗從容上言百
司度政具有成法第悉遵祖訓行之勿有所更則永世有
賴仁宗嘉其誠懇降救褒勉賜以綵幣鈔錠初命掌太常
卿事未幾加太子少師尋復進太子太保仍兼禮部尚書
配夫人謝氏卒朝廷遣祭給塋儀物并賜鈔米既而奉旨
祀古皇帝王陵寢于關西復加厚賜俾訖事便道祀先省
母恩榮之盛振古罕倫比還值今天子登極念公舊勞愈
益寵信凡冊立拜封及宴勞之事一任於公而不疑可謂
得行其所志矣公為人沉實寡言咲善惡惡善無所阿徇

是是非非不為苟容凡有聞見莫不指陳於上以明其曲
直人惟德之而無怨焉尤善薦士士之由公出者率為顯
官蓋其孝弟著於鄉閭信義厚於朋友天性也宣德元年
四月三日以疾卒享年六十有二上惻然悼念賜以棺槨
楮幣遣官諭祭復勅有司護送其喪以歸為營塋焉子男
五熊禎燾然熊為兵科給事中女三人薊州衛指揮劉
淳戶部主事張鶴橫海衛指揮王貴其壻也孫男二人數
敷熊奉樞將行迺以今禮部尚書毘陵胡公源繫所述公
之行來謁予泣拜請銘惟公以穎敏之資宏博之器歷官
累朝荐躋顯榮聲光振于當代業重於業榮名厚來祿克

保令終誠可謂盛世之賢輔矣自非負英偉魁傑之材曷
克際茲寵遇哉宜為之是銘銘曰公在齠髻既悟而聰聞
右視公如古神童年甫弱冠蜚聲場屋遨遊辟雍學成行
篤始僉外臺三晉是依入掌國賦出納允釐佐憲北平克
振風軌赫赫太宗寵潛于郎公受知遇眷顧寔隆迨于龍
飛偉矣其逢既職士師遂陞司寇再遷春官恩寵彌厚仁
廟繼統篤念舊臣進秩師保益信而恩親命維新被及先
代榮歸其鄉獨擅風裁今上嗣位謨協宸衷知無不言眷
待維豐謂公顯融宜膺盛福二豎見侵竟以弗祿乘化歸
盡捐世若遺公復何憾遐邇是思返葬家山安靈寔寔銘

以昭之永世無斁



浙江圖書館

光祿大夫少傅兼太子太師禮部尚書贈太保謚忠
安胡公神道碑
南陽李賢撰

我朝名公鉅卿聰明特達者多矣若器識宏遠福壽隆長
惟武進胡公一人嗚呼休哉公諱澂字源潔號別絜菴其
先淮安宿遷人有諱藩者仕劉宋為太子左衛將軍遷豫
章數傳至諱臧者仕唐為侍御史子常州刺史瓊生特因
家于常遂為武進人持四世孫曰宿仕宋為樞密副使宿
十一世孫曰中立為常州制置中立生昭公之高祖也曾
祖庸仕元為江浙儒學提舉祖禎為常州路醫學錄考宗
仁隱居不仕皆以公貴贈光祿大夫少傅兼太子太師禮

部尚書曾祖妣章氏祖妣徐氏妣李氏皆贈一品夫人公
生而髮白彌目方黑母夢一僧持花以遺之覺而生公居
數日有僧至家索觀僧即笑僧曰此吾師天公見池高僧
後身也命我求見以哭為誌果然聞者咸驚異之公自幼
端重不好嬉戲弱冠入邑庠洪武中領鄉薦登進士第授
兵科給事中尋遷右給事中公勤識大體士林譽之太宗
文皇帝入正大統公供職如舊永樂改元秋以奏劄稱旨
陞戶科都給事中丁亥上察近侍中惟公忠實可託遂命
公巡遊天下以訪異人為名實察人心向背時御製性理
大全為善陰隲孝順事實書成俾公以此勸勵天下以故

雖窮鄉下邑軌跡無不到在湖廣間最久丙申秋還朝丁
內艱乞終制不允尋進禮部左侍郎明年住巡江浙諸州
授嘉議大夫癸卯復自均襄還朝時車駕親征北虜駐驛
宣府公馳謁行在所上臥不出聞公至喜而起旦慰勞之
曰卿驅馳良苦賜坐與語凡所歷山川道里郡邑豐嗇民
情休戚以至所聞所見保國安民之事悉為陳說上欣然
納之向所疑慮者至是皆釋北退漏下四鼓先是仁宗皇
帝為太子監國時有飛語上聞文廟屬公往察之公至以
所見亡事皆誠敬孝謹密疏以聞上覽之大悅自是不復
疑仁宗嗣位特賜誥命授正議大夫資治尹已而聞公曾

有密疏疑之乃轉太子賓客兼國子祭酒之官南京未幾
閱章奏見公所上密疏深嘉其忠方議重用之而龍馭上
賓矣宣宗皇帝卽位復禮部左侍郎兼職如故洪熙乙巳
冬公自南京來朝上素重公及入見顧問良久卽留任行
在禮部事宣德改元春進尚書是歲秋漢王謀叛事覺公
贊上親征事平公受賞賚甚厚復給叛者家屬四人丁未
賜誥命授資善大夫復賜近第江區長安右門外給閣者
二人戊申上嘉公忠勤特賜銀章四其日文恭世家曰
清和恭靜蓋嘉美褒美之也尋以公生辰賜宴於其第秋
八月公扈從巡邊至會州而還己酉命兼詹事府事夏五

月復扈從北巡時常民有豪橫者既抵于法悉以田宅賜
公辛亥命兼行在戶部事聖節御製詩一章賜公及蹇忠
定楊文貞文敏三公且曰朕茂膺天眷惟爾四人贊翼之
功因賜宴盡醉而熊新建禮部成命光祿設宴鄖戚公鄉
皆往賀公公以為盛事立石廳事之右倚任益隆每燕見
上虛心問曰卿有何言得其章奏即施行之時有芝產于
公署人以為公和氣所召今上皇帝踐祚亦惟圖任舊人
待公尤厚凡軍國重務皆與聞加授資德大夫正治上卿
每考績必有賚予甲子以年至七十一上章乞至任上以公
精力未衰慰勉留之己巳上親征北虜命公留守京師秋

八月進太子太傅階榮祿大夫景泰初賜誥命辛未春公
因災異數見乞放免以為天意不許尋進少傅壬申兼太
子太師二俸兼文公固辭一俸癸酉復賜誥命進皆光祿
大夫自後每年引年乞歸皆不許丙子復因災變乞賜罷
黜亦不許時公年八十二忽疾作艱於步履明年皇上復
位公喜不自勝扶疾入朝而筋力不可強矣遂乞謝事旦
辭師傳二職上方重用耆舊憫其老皆從之陞辭賜白金
寶鎰金織襲衣給驛舟以歸復賜璽書有卿宅心允減處
事惟慎雖經變故無改厥常之諭歸之日鄉人老稚聚觀
者以億萬計公陳所受賜於堂感激泣下遣家子長寧詣

闕申謝上念公歷事累朝遂官長寧為錦衣衛世襲鎮撫
俾歸終養公之弟克恭克寧克誠時年皆七十餘蒼顏白
髮燕樂於一堂遂扁曰壽愷優游桑梓者七年疾復作召
諸子前曰爾輩圖報國恩勿墜家祚遂瞑目而逝天順七
年八月八日也享年八十有九終之夕常州守卓天賜夢
公來辭已而聞終大以為異計聞上為之震悼贈太保謚
忠安遣官諭祭於其家復令有司營葬事恩榮始終世莫
與比公為人平易寬和廉靜寡慾自奉淡薄起居有長居
官敬慎一毫不苟歷事列聖無纖毫過舉蔚然為一代名
臣立朝幾六十年薦拔士類甚多十知春闈貢舉天下之

士盡出其門平居未嘗疾言遽
雖庸夫孺子亦知其為
長者暇則手不釋卷喜為詩文晚年譽望益尊其酬應愈
劇曾不厭倦所著有芝軒集若干卷又嘗輯錄醫藥經驗
者曰衛生易簡方經進又有律身規鑑俱行于世公配范
氏早卒累贈夫人繼張氏累封夫人子男四人長曰銜即
長寧居母喪廬墓有司聞于朝旌其門曰孝子次曰衍以
武舉得官沒於王事次曰儼錦衣指揮僉事次曰嗣女三
人長贅林玘次適成國公朱儀次適陽武侯薛琮孫男一
人曾孫男一人銘曰大明盛時有臣胡公從容其問以篤
其忠始為夕郎乃教胄子輿論攸歸多事咸作賓春宮遂

長春官列聖倚之四海人安國之老成進位師傳溫恭維
人翊我皇度公在朝廷六十春秋祿位優游莫之匹休公
身雖亡中有不死懿行崇功昭彼信史

浙江圖書館

五
十
五



浙 江 圖 書 館

禮部尚書吳縣楊公傳

長州王鏊撰

揚翥字仲舉吳縣人宋和恭武王存中八世孫少孤貧與
兄戍武昌為鄉校師有狂生侮詈之翥若不聞人以告翥
曰豈無同姓名者邪人服其長者久多化之揚文貞公士
奇漂寓武昌偶憇翥館以無資告翥遂讓其熟自教授他
所日往返十餘里不厭比文貞當路乃相引援仁宗素知
翥遣使驛召之授翰林編修并修撰與修三朝實錄遷邨
王府長史歸景帝即位翥朝京師命為禮部左侍郎而食
祿致仕又二年復朝進尚書加祿仍歸翥篤行不欺仁厚

絕俗隣人作室簷溜落翦家人不能平翦曰晴多雨少何
必校也又鄰人產子翦恐所乘驛鳴驚之即鬻驛步入廟
猶子懷金入市為人攘去以告翦不荅或請理于吏翦不
許支貞公落新第亟邀登堂曰舍初成得吉人首臨之其
寬雅德度一時著聞至今鄉郡以為口實為文章平實有
理如其人年八十有五卒詔賜葬祭召其子瑋入朝問所
欲為官對曰願得本縣主簿從之

浙

資善大夫禮部尚書應州石墓誌銘

永新劉定之撰

天順六年壬午夏禮部尚書石公請致仕上不許其秋以
病申前請復不許命御醫往視泊其勿藥乃止其冬又以
病告但許其不朝仍泣事于部又之以不起聞時十二月
二十有三日也上閔悼有加遣官諭祭送喪歸故里塋費
皆官給公之子居敬將從柩行投泣自狀公行謁予請銘
墓按狀公諱瑁字信之其父普金當元季兵變自雲中來
徙應州公旣貴贈其父禮科給事中母王氏贈孺人公資
稟端厚自少知孝交舉動有儀父嘗有疾灼艾于腹公亦


取艾灼腹醫止之公曰吾不忍父獨痛苦也已父嘗為公
製衣公曰兄年長於我請先為兄製嘗踰戶限衣絰而止
兄戒以胡不緩步公跪謝後不敢由是父兄皆奇公以為
當成大器父漸老矣家務主于兄公於錢帛無毫髮私取
與悉由兄所制領宣德己酉鄉舉庚戌入國監登癸丑進
士觀政戶部收通州倉糧草去宿弊今止正統初授禮科
給事中是科當奏對事尤多公以舉職聞擢知金華府鄰
郡括蒼盜起兵出擊之掠酒食殺人于郭外公執斬以徇
始帖然就部伍以去民避盜來者老稚扶携千百為群皆
乏食非開官庾莫能濟上官疑莫敢公曰彼迫於殍死則

亦為盜矣擅開庾與迫民為盜罪孰重我就其輕者得譴
無悔也開以濟之歡聲雷動蘭谿吏徐世揚浦江卒王猛
烈皆為其邑患若公置之法衆以寧謐毋憂去任都御史
軒公輒以公取弭括蒼盜饋足守固民怙其仁兵懾其義
非特其所涖郡其旁近亦有賴焉為言于朝者旨起復還
任尋陞福建右布政使時所部內沙縣盜始平增築城以
鎮其地以公有聲于浙也城事悉以委公公為之計工匠
度財用兵民合力近遠輻輳城完以期而無告勞者屬郡
稅比歲多逋聞公當督稅民咸相告來輸曰石公不苟取
于我無以此累之公生平以廉著稱福州守雷礪以公當

入覲持金往贖亦峻却之他可知也上聞其賢以為南京
吏部左侍郎未幾遂召為禮部尚書靖恭于位朝望益孚
甫三載而卒得年六十有四配封孺人郭氏子男二人長
文昌寶早卒次居敬今為邑庠生孫男一人女二人公墓
在應城東三十里劉義村先塋公雖不克享上壽以究天
用然遭逢聖主恩禮之隆榮于其終可以為臣道之光而
垂休後徹矣是宜銘銘曰帝治之隆公卿毗之維春官鄉
石公是宜典茲禮樂假如神祇郊廟朝廷抑抑令儀公初
立朝禮科瑣闥出守名郡轄蓋峩巍全閩方伯威惠兼施
入佐銓衡于舊京師才鉅務寡命召公歸任其所長復以

禮畀其位既窮聞望四馳人曰帝舜公為夷夔今其云亡
宸眷不衰高車載柩丹旒素帷維祭與墓詔于有司履歷
之概銘幽有辭

浙江圖書館



浙江圖書館

資德大夫正治上卿太子少保禮部尚書贈太子太

保謚康靖鄒公神道碑

幹

宜與徐溥撰

資德大夫正治上卿太子少保禮部尚書鄒公以德重望
致仕家居壽躋八十有四乃弘治壬子某月某日卒卒之
前二月公以杭屬縣大饑心切憂閔手具奏疏以聞上嘉
公身居里不預政事能達民隱如此既詔有司如所奏賑
恤卽出內帑文綺賜公以旌其賢及是上聞訃悼歎諭祭
營塋一如卹典特贈公太子太保謚康靖恩禮優渥人皆
榮之公諱幹字宗盛別號順菴姓鄒氏其先嘉興人也後
徙仁和再徙餘杭故今為餘杭人曾祖福堅妣某氏祖壽

之資政大夫禮部尚書妣沈氏贈夫人父濟詹事府少詹
事贈太子太保謚文敏妣薛氏贈一品夫人文敏公任太
宗皇帝時為宮寮卒時公尚幼適仁宗皇帝監國南京時
遣充應天府學生親加諭勉賜鈔二千貫仍月給米二石
以資養之公感激奮勵力學不懈正統戊午中鄉試明年
遂登進士第庚申初授兵部職方司主事歷升署武選司
員外郎郎中己巳八月北虜犯邊英宗皇帝北狩京師戒
嚴一時所需甲杖糧餉未有能任其劇者僉以公為宜乃
超遷兵部右侍郎公瘁竭智力日共厥事倉猝間斧廩以
給兵士或不俟奏報而行一日兵士擁東城門請給馬草

適鄉民萬計避虜走城下叫號求開門守者難之公曰草
不得則廐馬不過瘦死爾城以衛民若無所衛焉用城為
且聞虜距城尚遠即至近境門聞無及而民皆死矣竟從
公言獲濟及虜退明年改元景泰被勅獎諭辛未清軍職
貼黃事竣改禮部壬申奉勅考察山西官吏癸酉河南鳳
陽等處大水詔往救荒民多受惠凡為奏免稅糧若干萬
石既歸命督易州山廠薪炭積弊頓革因奏設主事一人
綜核其事公獨總其綱而已居三年衆議以公不宜久處
此召還治部事尋陞左侍郎進階正議大夫資治尹天順
丁丑英宗復任故尚書胡公方致其事去諸冊立大禮並

從公詳定而行時襄王來朝故事當祭禁門而入自遷都
後來朝禮絕莫有知者公檢太常故典行之及上不豫復
奏行皇太子御文華門代朝禮成化丙戌憲宗皇帝二年
也命撫安畿內許便宜行事明年以老辭位不允未幾特
拜南京禮部尚書居二年召還禮部仍令經筵侍班自是
治部事者十年至加太子少保屢以老請上皆不允後復
請不已特賜勅致仕令馳驛還仍有司月給米二石令給
僕夫四人蓋家居者一紀而終公性謙謹喜揚人之善處
事是是非非不肯詭隨忠勤奉國老而彌篤嘗因災異首
以妄費濫賞及脩苑囿設齋醮為言後以度僧道過多因

極言其弊奏為定制至今遵行之少侍文敏公多聞典故
及居官往往述以諭諸寮屬其言皆可書蓋一代之老成
人也公配王氏贈夫人先卒子男二長煜次煥國子生長
適鳴臚寺序班蘇和次適慶州衛指揮使牛洪孫男三圭
坤堂女五長適杭州前衛指揮陳震次許適李端其二尚
幼以卒之明年某月某日葬餘杭山之原煜奉南京大里
寺少卿致仕夏公之狀來乞銘其神道之碑為之銘曰餘
杭有鄒來自攜李山川清竒乃鍾厥美惟文敏公廟食邑
中仁皇眷念公為孤童感激不志甲科是繼克世其家益
大名位豈惟大之身寔有勞郎署起遷始于兵曹都城介

嚴武事克濟暫出而還遂擢禮侍旁稽典故以贊治朝宗
伯之任居而不驕帝曰汝嘉登之宮保寵命日隆屢疏請
老終焉得旨優游里閭險歲憂民日有奏書嗟茲老成世
豈多有畢公去周厥德愈懋公既逝矣賢名則留恩澤所
及貴于高丘再世易名為時令族祠墳相望過者必肅樹
碑神道松陰峩爰勒茲銘永永不磨

浙江

資德大夫正治上鄉太子少保禮部尚書謚文安周

公神道碑

洪謨

宜興徐溥撰

周之先為蜀之資陽人宋紹興中始徙叙州之長寧故今
為長寧人七世祖惠仕本州知州曾祖世祥祖本原父永
隆俱儒學訓導邑人稱世儒周氏以別其族至以儒術
大顯於世公諱洪謨字堯弼號箬齋又疏南臯子自少穎
敏好學不倦侍父官長陽處諸子中卓然有名正統甲子
領四川鄉試第一明年復占第一甲進士授翰林院編脩
景泰壬申左春坊贊善丙子脩寰宇統志成升侍講天順
戊寅進侍讀署南京翰林院事甲申憲宗即位召脩英宗

實錄改翰林院侍讀丁亥進學士升南京國子祭酒丁母
 憂服除改北京祭酒擢禮部右侍郎由左侍郎拜本部尚
 書丁未進太子少保積階資德大夫正治上鄉今上即位
 位之元年為弘治戊申上念公薨以老請致仕令乘傳而
 歸陞辭之日恩禮不替又三年以疾卒于家卒亥二月三
 月二十三日也壽七十有二訃聞命有司諭祭治賁仍賜
 謚曰文安公少以文為業然有志政務多所建白初在翰
 林即勸上勤經筵以講聖學謹內治以敦正本復條十二
 事以進及蜀寇作與長寧隣境公稔知其出沒設禦備之
 術甚悉遂見禽而其地宴然及為祭酒整飭規矩表率生

徒且言脩祀事廣倉儲禁酷刑減征稅攘虜撫夷十事上
悉嘉納之又言聖朝尊崇孔子其塑像冕服既循前代之
舊用天子之制而禮樂不稱封號不如殊為闕典宜下禮
部議之尚書鄒公以尊崇孔子初不在此為奏然朝廷竟
用公言始增籩豆舞佾之數在禮部時首言書載璿璣玉
衡蔡傳不得其制乞改造以備占後既成有羊酒寶鈿之
賜後烏思藏等慶入貢其貢使數踰舊制一歲中有至三
四千入者賞賜靡費不可勝計自長河西諸蕃皆冒以圖
利公言此特無印符為驗耳宜依海外諸蕃例各給與符
二十道入貢備填貢使物數于上仍識以舊賜金印至關

驗以防詐偽詔從其議其費始省丁未月當食不食或以
為宜駕公謂此陰盛之象其可賀耶遂止嘗奉命祭天壽
山神見後夫運載相繼于道知有所營建也歸言月令云
盛夏不可興土功又曰舉大事則有天殃今歲大旱未必
不由於此且時方炎蒸人易疾疫宜暫休息之不報及既
歸老蜀中惓惓不忘朝廷猶力疾䟽安中國禦四夷十事
遣人馳進悉命所司議行蓋公忠勤之心至於終身乃已
公平生尤喜著述凡經史稍有疑輒訂正之其為文簡直
不為奇險語而理致明白粲然可愛所著有疑辯錄三卷
南臯子集二十卷箚齋集五十卷公之祖父並累贈資政

大夫禮部尚書妣趙氏韓氏並贈夫人配王氏咸寧教諭
錡之女有賢行封夫人子男二長汝端鄉貢進士汝靖國
子生女三長適鄉貢進士李鯤次適進士劉武臣又次適
任琛公為人莊重和厚喜怒不形與人交久澹如也劉客
談論出入經史亶亶無窮性更孝友侍母夫人居兩京極
其奉養待弟洪範恩義兼厚鄉黨稱之予與公舊為僚友
相好且久以卒之明年某月某日葬公于某山之原其子
持禮部尚書耿公之狀泣拜請于神道之碑義不得辭也
銘曰公昔翱翔來自西蜀甲科高躋朝士屬曰詞林春坊
出入仕祿惟仕既優而學則篤矻矻歲時不忘誦讀堂堂

辟雍士遭教育帝曰汝賢有命宜服舊規獨持造就何速
乃登禮部自亞而鄉國有大禮屢議而行夙夜在公勤勞
不寧遇事即言豈畏近名奏疏屢上擄忠獻誠朝廷更化
登用老成公忽引去尚被恩榮孰知三載遂隔死生惟公
著述縱橫几案遺彼後學有疑已辨惟公諭議老而不倦
載在國史後當有傳巍巍蜀山白石嶙峋後菜茲高墳孰
云父亡邱典維殷乃闡神道樹之堅珉百世而下考于茲
文

浙

太子太保禮部尚書東谷徐公墓誌銘

瓊

南城張昇撰

舊禮部尚書金谿徐公乞休後五載爲甲子歲壽躋八稔
余輩偕卿舊暨原僚屬賦詩與幣附南使以柱壽公明年
公仍賦詩及鄉物介鄉親饒惠徵馳寄京師以肅諸公意
誦公之作雅健有壯年氣聞惠徵脩述公精強飲啗尤勝
雖壯年人罕及終日對客談噉不已繼之以夜並無倦容
衆喜而驗以詩其壽以數限曾未浹旬忽傳公物故衆耶
乃疑駭猶未信已而邸報果然傷哉訃聞上亦震悼卽命
禮部行江西布政司官諭祭工部遣官營塋事行者日矣

其家僮適至携翰林院侍讀羅君景鳴狀請余以銘余辱
愛厚且久晚叨同寅之誼銘其敢辭公諱瓊字時庸號東
谷又號明農翁先世居臨江至有號栢軒翁者宋時為撫
郡博乃遷金谿柘岡家焉高祖諱淵曾祖諱克明皆弗仕
祖諱邠用績學有聲號萬竹翁考諱貫道介時自將號樞
逸祖考俱以貴公贈資政大夫禮部尚書者也公自幼沉
敏篤學深有造詣領景泰庚午鄉薦卒業太學殊文舉天
順丁丑進士登黎淳榜第二人授翰林院編修三載以考
最封父如其官及配俱孺人是歲八月以外難去起復預
修英廟實錄成化丙戌同考會試士得人為多丁亥脩大

明一統志成陞侍講又以內艱去服闋復任辛卯秋闈被
旨校文于南京士咸服去取公當是歲偕兵部侍郎李震
清武職甚精丙申推陞南京翰林院侍讀學士署院事庶
子三載考績又有貤恩之典丁未春陞南京太常寺卿掌
南京國子監事一時南士悉賴造就行文卒歸于正三載
又贈及祖考妣及配繼配俱淑人弘治庚戌陞南京禮部
右侍郎癸丑改北部左侍郎丙辰陞尚書恭勤政務斯夕
不懈寅出酉還衣常不解事上處下忠誠不易結知聖主
眷禮異常遇郊歲賜緋袍有副代午加授太子少保是冬
入朝而昏瞽遂臥疾于家上驚怛亟遣中使挾醫往視尋

賜鼎肉及牛黃丸以療之進階資政大夫加贈祖考尚書
妣及配俱夫人庚申懇疏乞骸上重違其情乃加太子太
保從一品秩賜璽書驛舟歸令有司饋米月三石僕夫歲
四名陞辭賜酒饌又遣內侍齎麟袍玉帶白金寶鑑以寵
異之撫諭之意益勤致政年方七十有六迄今沒乃八十
有一沒年乙丑四月二十日也生年洪熙乙巳十月二十
七日也配吳氏夫人卒繼配劉氏夫人俱賢淑素著有二
子張曰賢國子生需次銓曹而逝先娶五峯詩氏繼娶安
仁金氏側室新田吳氏王氏次曰員尚幼孫男五長曰高
明娶車氏次曰欽明緝明真明保明孫女二長適撫城饒

憲次適武港荀鏞將以某年月日塋于臨川金石臺之右
嗚呼公平生重厚恂恂言若不出諸口曠度宏量雖犯而
不校蓋謹願君子也余猥托隣邦鄉曲伊邇童時聞老者
言公始入邑庠掌教預夢有馳告之者云西王先生至蓋
先年禮部尚書王公英亦金谿人也翌日掌教見公日子
勉之西王先生聲蹟將子子乎在厥後入翰林歷學士詞
翰名四方式媲美西王先生官至禮部尚書位望亦與之
等而掌教之夢果符是則公之生也有自來夫豈易得者
哉余自童時慕嚮乃叩入翰林遷禮部兩得與公周旋為
幸今公不復作矣余尚恐言也哉不知涕之所從出也強

銘曰猗歟金谿溪山秀英爰生德人為鄉之刑其出而顯
名在清朝文筆史冊士仰風標式于成均優于典禮清朝
迭躋榮達終始歛而歲駕腰玉服麟童趨耄迓觸慶生春
奄閱夜臺詔榮其兆恤典優恩光騰昏曉金石臺右汝水
之涯式完以固吐納雲霞

浙江圖

資善大夫禮部尚書贈太子太保謚文穆傅公墓誌

銘

長沙李東陽撰

初公以足疾在告上遣醫診視兼賜蔬米羊酒諸物乞辭
印不許請停俸亦不許凡值時節朝賀奏表箋方物請不
署名亦不許久之再乞休致上若曰鄉學行端慎才望著
聞方切倚任宜善調攝以副眷懷其勿固辭比訃聞上震
悼諭所司曰瀚侍朕講學久可特贈太子太保謚文穆仍
遣官加祭給驛護喪治葬事賜寶鏹萬貫為賻蓋聖天子
篤念舊學於賢且榮者尤厚近倪文毅公及公卹典皆曩
出常格倪公之卒天下共慟之而公復繼踵以沒予二公

同年交最厚方與公經紀倪公後事不謂其遽至此既銘
 倪公忍不為公銘邪公姓傅氏瀚其諱也字曰川以府學
 生舉天順己卯鄉薦登甲申進士第入翰林為庶吉士成
 化乙酉丁內外艱歸戊子授檢討己丑奉命教內館憲廟
 見古帖隻字百餘亟走中使令公編次公韻為二律頃刻
 而就乙未同考禮部校閱精確得今吏部侍郎王公鏊為
 省元丙申侍經筵丁酉秩滿遷脩撰戊戌兼司經局校書
 東宮講讀丙午秩再滿遷左春坊左諭德兼檢討充講官
 考順天府鄉試解元則今羅編脩玘也丁未奉命教庶吉
 士業以今上登極恩擢太常寺少卿兼侍講弘治戊申親

耕藉田辛太子皆以職事從太廟祧裕皆預議進直日講
儀度雍雅詞義懇到上每為注聽焉辛亥憲廟實錄成以
纂脩功進太常卿兼侍讀學士壬子掌院事乞歸省墓命
馳驛亟還特賜寶龜銀幣致且再告教士擢禮部右侍郎
時倪公為尚書公寅恭奉職茲稱為賢丙辰皇太子冠諸
王婚及郊廟諸祀事多所贊相轉左侍郎請限度僧道減
十七八己未知禮部貢舉嚴為範防中變更故卒不失正
時東宮出閣講學朝廷方慎簡宮僚公用廷薦兼學士掌
詹事府事仍直日講適脩大明會典充副總裁官庚申拜
尚書掌部事保定有獻白雅者公言祥瑞不當奏斥遣之

陝西守臣得玉璽乞頒示天下公歷考傳記形製篆刻皆不合且言我朝自有璽可傳萬世無所事此乃寢不行他如脩政弭災諸疏剴切不阿多類此尤勤政務每力疾視事蜀纒前一日猶削祠祭藁心計手畫必求其當乃已蓋其性然也傳氏本出吾長沙之湘潭唐末徙臨江之清江宋南渡再徙新喻曾祖諱原顯鄉稱為樂全處士祖諱汝器考諱邦本皆贈通議大夫禮部右侍郎祖妣劉氏妣簡氏皆贈淑人配李氏繼胡氏並有內行贈封皆淑人子二長尤以廕補國子生舉順天府鄉貢文行有父風次完以廕中書舍人業女二長適府學生溫玉次許嫁縣學生

章鳳梧孫一選府學生曾孫二纓綵公生宣德乙卯二月
二十三日卒于弘治壬戌二月二十日年六十八是歲某
月某日葬于某山之原李淑人祔

豐

神采溢發

孝誠終慕仲弟曰茂季潮皆

書

潮

舉進士累官工

部郎中卒于南畿公聞

足

增劇李淑人病不至

勝卒不議繼者數年

人貧病必加賑卹死為棺歛歸其

喪與人交義必過厚值所傾信終身不二聞有善則樂道

之其識量宏裕尤人所不易及者博學彊記為詩文峻整

有格書法亦適美為時所重有體齋集若干卷藏于家其

遺事見王吏部所著狀者不具載銘曰古秩宗職惟清直

寅國朝多賢公哉其人公身不污中自檢濯非法勿動繩
循矩度峩冠重紳夙夜在公一事弗終我心忡忡操是三
者共所受職匪公匪戡公我弗克世負秉率為酸寇公有
慎厥居綽乃有餘納忠閉邪公在講渥發潛誅諛公在史
局翰林儲才如古宅俊公其人哉用有攸蘊生才寶難其
始自天有才弗終抑又誰愆人之存亡惟國攸繫我銘匪
私以永公世

浙江圖

光祿大夫太子太保禮部尚書贈太保謚文端周公
神道碑

長沙李東陽撰

昔在英宗復辟之登明選公儲養俊哲日以敷遺于後時
太原周公實領國史越三朝四十餘年荐歷諸曹官至一
品再謝政事以功名終君子謂其遭際之盛出處之善胥
得之矣公諱經字伯常世居陽曲為距族高祖諱某元萬
戶曾祖諱溫甫祖諱傑皆贈資政大夫都察院右都御史
考諱瑄南京刑部尚書贈太子少保謚莊懿皆以公貴贈
光祿大夫太子太保禮部尚書曾祖妣任氏祖妣張氏妣
喻氏繼顧氏皆贈一品夫人公舉順己卯鄉貢天庾辰進

士入翰林院庶吉士壬午授檢討成化丁亥脩英宗實錄
成進編脩己丑同考禮部會試丙申直講筵秩滿進經侍
讀丁酉考南京鄉試戊戌改春坊左中允侍皇太子講讀
辛丑莊懿公致仕居南京公乞往省命給驛賜道里費且
速其來講御製文華大訓皇太子每起立拱聽內閣大臣
或以為勞謂公宜跪請坐聽公不從竟得如禮甲辰丁莊
懿公憂服闋久弗調或諷使圖進取計公峻却之孝宗登
超極擢太常寺少卿兼侍讀弘治戊申命直日講脩憲宗
實錄未成己酉擢禮部右侍郎每議政莅事必傳經義若
却四城貢獅毀黃村尼寺為先朝盛德事皆公與左侍郎

倪文毅公贊成之辛亥改吏部遷左侍郎一日有中官諭旨欲以通政司經歷高祿為叅議公獨承諭執不可退與尚書王端毅公上疏論之靈壽人獻大明川民田于太監李廣戶部駁議弗得公謂諸司宜會奏尚書耿文恪公屬公且草上之事遂寢乙卯諸司以災異言事吏部請早視朝勤聽政節侈費省遊幸止貢獻而斥樂戲一事尤激亦出公手後有蹤跡為此草者以問耿公公曰宜以實對耿曰吾為尚書不宜他諉時論蓋兩賢之丙辰拜戶部尚書諸王府多奏欲自領河泊所賜稅罷其官公言國體非便且民力不能堪乃止有中官織幣南京奏給長蘆鹽八千

引鬻于兩淮仍給淮鹽價銀二萬兩公言鹽筴本以濟邊
且各有分地若公許越境則私販必多官鹽反滯命止長
蘆鹽勿給浙江守宦亦請給竹木銀鈔稅為織費公又言
關征非舊且浙地大水民困徼役乞暫停織造從之每委
官監稅必諭以愛節民力課入多者則與下考大同缺馬
尚書馬端肅公請給折糧銀就市之且戒督糧官毋得沮
格既得旨公言糧馬各有職不宜侵奪且引祖訓六部不
許相壓之文為據詞甚激上為改命兵部以馬價銀充用
給事中魯昂以財用匱乏請令諸藩公帑積貯及均徭羨
銀盡輸太倉公言用不足者蓋以織造賞賚齋醮土木之

故若一切節省自宜少裕必欲盡括天下之財恐非截富
放民之意又有旨取太倉銀三萬兩為張燈具公言不可
以小民膏脂供耳目之玩乃命以明年內庫歲額補還之
內靈臺奏增灑掃卒當給月廩公言禁地非外人所得入
不過為守者私役耳疏再上竟寢之清寧宮災方議脩建
兵部欲調山東民夫七千餘人公曰今歲歉民貧不可使
遠去卿并請以本部羨銀就京師雇役為之外戚張氏有
河間賜地數百頃欲并其旁近民田千餘頃得之且乞畝
加稅銀二分公言河澗多沮洳比因久旱貧民即退灘地
耕之遇潦輒沒即欲加稅將有無窮之害且王府賜田例

畝稅二分而此獨加稅人將謂朝廷待外戚與宗親異矣
又聞憲宗妃家亦有私田與民田比一切奪之彼亦無矣
為業人又將謂朝廷待張氏與他外戚異矣疏三四上後
有以地獻為東宮莊者上因公奏皆抵之法一無避戚責
幸有所陳請公一裁以法皆歛不得肆有言官及部屬以
言事獲罪與同官上疏揀之聲稱籍甚而怨謗亦日深庚
申以災異乞休致詔許之加太子太保賜勅給驛令有司
月給米三石歲給輿隸四人命下廷臣皆相顧失色爭上
疏留之不得自是數年中外請留及復起者多至八十餘
疏前此未之有也公歸摘勅詞二字為保完堂嘯傲其間

乙丑今天子嗣位特起為南京戶部尚書公辭以疾會丁
繼母憂未上戊辰服闋改禮部又辭上降勅遣使即其家
起之至京疾作寓都城外上遣人慰問賜玉帶及通鑑纂
要以示寵異比莅事數月疾復作累疏乞休及許之復賜
勅褒諭推封三代月廩輿隸視昔有加焉公婿曹公以貞
時為太子少保兵部尚書留公暫駐京邸以便醫藥明年
乃行又明年以貞入內閣叅預機務報至以疾公革聞而
顧之遂暝庚午二月二十二日也上震悼輟視朝一日贈
特進光祿大夫右柱國太保謚文端命工部治葬事禮部
諭祭者九公年七十有一以是年十二月三日寔于彭村

之原配韓氏陝西按察司副使仕琦之女慧而知學先公
五羊卒已賜葬至是而合子四人長孟以廕為右軍都督
府都事次曾舉進士累官尚寶司少卿皆有世守次齊早
卒女五人長適山西都指揮僉事張雲次適四川右叅將
高鸞次適以貞名元次適山東布政司左叅議鄭允宣次
適陝西布政司右叅政陳璘皆被封命孫七人長元祐女
孫四人長適高承惠餘皆幼公鄉試時有甘露降于縣學
之松學者因稱為松露先生公亦以自號少穎敏而莊重
寡言笑繼母性嚴急奉事惟謹遇諸弟友愛曲至母弟綸
早卒撫其四孤皆有仕籍少受學于吳布政繹思吳既謝

事歲致衣一襲銀十兩終其身其交蔡知府霖卒申御史
論罷官皆貧甚並致優卹又不厭其敦尚義氣類如此為
詩文及書麗而有則自為小官已志世用日侍莊懿公習
聞天下事又置清散兩薦為內閣不果入其為尚書簡任
屬吏親為裁決剝繁應變略無稽滯而秉正執法不為權
所撓尤人所甚難者予與公同官又比以孟魯請銘神道
因撮其行業之大而於戶部獨詳焉墓銘出少傳新都揚
公者尤備可互見也銘曰國有世臣實稱濟美其最貴者
尚書父子施何耿王為白及倪公蓋其一他莫與齊麥有
兩岐芝有三秀矧人有生得物之厚惟家之昌維國之光

氣運攸繫亦靡厥常兩都四曹公際其盛令終全歸公受
其正父曰莊懿子曰文端代有美謚夫人則難亦有難者
祖孫科第公居其間有倉有繼一品雖榮公不為華七十
誠希公不為遐胡進之難而退其易所不朽者匪世祿為
太行之西有生若人百世而下其永有聞

浙江

圖

明故資善大夫禮部尚書致仕贈太子太保石

城李公墓志銘

昔成化戊戌常熟李石城先生始自翰林院編修遷
侍講又九年丁酉遷侍讀學士後孝宗登極以先
生有青宮講讀舊勞稍迂左春坊左庶子學士如故
既而憲廟實錄成與生先同職纂修者遷少詹事
或太常少卿仍兼學士惟先生迂南京國子祭酒以
去雖燕賚加祿之禮不缺焉然出入遠近之間禮意
不侔矣說者謂當道厭人好直故用意沮尼於其中
豈其然乎既而先生連遭內外難俱特賜葬祭洎

服闋起為太常少卿兼侍讀學士遂遷南京禮部右
侍郎轉左侍郎拜南京吏部尚書復召為禮部尚書
時中官劉瑾亂政受某府親藩重賂欲以鎮國將軍
為郡王恕先生執成法議之將中以危法賴

上心垂察止令致其事以歸劉瑾既誅詔吏部疏
起臣舊有才識為瑾所擯斥者先生名在首列然
雅意林泉無復有仕進意矣嗚呼當道者能居人於
祭酒之時而不能居人於宗伯之日劉瑾能怒人於
議禮之際而不能怒人於疏起之時况先生幼學壯
行克全晚節名遂身退貽福無彊是固平生好直之

報天定固能勝人也豈瑾輩所干與哉先生諱傑字
世賢以世扈常熟石城里別號石城雪樵生正統癸
亥卒正德丁丑家譜遭元季喪失無所考今以曾大
父扈仁府君為始祖云既貴獲贈大父濟父希潤俱
禮部左侍郎祖妣徐氏郭氏妣徐氏元配章氏俱淑
人側室曹氏生長子曰而達應例授七品散官繼配
戈氏生次子曰而進授光祿寺署丞曰而遇授中書
舍人皆先生廕也女五人錢奎趙原錫劉夢錫顧榮
華翰其壻也孫男四元紹元显元貴元望初先生為
編修侍講時嘗充經筵及青宮講讀官三為會試同

考官兩同兵部侍郎及都察院副僉都御史為清理
 武職貼黃為學士時嘗主考順天鄉試及為殿試讀
 卷又為纂修實錄兼校正官為少卿學士時經筵講
 讀以旧臣仍首為青宮講讀又為纂修大明會典副
 總裁官後闕里孔廟災 命奉香帛往祭告為禮部
 侍郎時因夏旱 命祭禱天壽山而雨又為泰陵山
 陵使既沒蒙賜 諭祭二壇有司為造墳安葬凡此
 皆關係 朝政大体故並書之公自幼穎悟至老猶
 手不釋卷在仕路四十年歸田又十餘年有文集若
 千卷藏於家今其子某等皆淳雅有文行足以增光

而裕後先生之澤固未艾也銘曰 惟公高直匪徐
與亟魚為當路所抑晚而際遇出入皆榮宗伯歸來
道若可行虎豹九關莫達鴻飛竟爾冥之予之斯言
亦豈足以槩公之平生也耶書

浙江圖

浙江



浙江圖書館

大明資善大夫禮部尚書贈太子少保謚文毅傳公神
道碑銘

馮蘭

公諱珪字邦瑞號北潭保定清苑人曾祖貴未仕祖
信嵩縣主簿父泰太學生號柳庄散人母劉氏配王
氏公初授翰林編修得贈父如已官母贈孺人配封
孺人至通議大夫吏部在侍郎加贈祖與父官俱三
品祖母與母暨配俱淑人公沒十餘年嘉靖改元追
賜名臣贈謚贈公太子少保謚文毅其配王淑人以
子祭主事君先任中書舍人三年秩滿仍從公貴加
贈為夫人公幼時厚重敦敏柳庄鍾愛授詩傳刻志

奮勵登丁未進士選翰林庶吉士弘治己酉授編修
丁內外艱服闋復職丙辰爲會試同考官

經筵展書兼司經局校書與修

大明會典陞左春坊左諭德兼侍講充講官有金帶緋
衣之賜正德改元與修

孝宗敬皇帝實錄并清理武職貼黃丁卯主考應天鄉
試戊辰主考武舉己巳教庶吉士進講官是歲實錄
成當陞職值逆瑾竊政欲摧抑詞臣搜索往事謂公
嘗修會典字多舛訛降修撰尋以實錄恩陞左中允
再陞侍講學士明年陞學士主考順天鄉試進吏部

侍郎轉左侍郎陞禮部尚書時政歸權逆變革廢弛
公既莅仕振舉綱維事之巨細悉遵

祖宗程法屏息干請人不敢以私窺嘗條陳十事皆國
家大計四方災異來奏皆具疏以

聞言甚懇切教坊禮部屬也時憑寵肆過以其舊篆狹
小詭奏篆文模糊請易鑄公但令倣舊式鑄與之諸
教坊官乃日騰謗欲以中傷部屬吏部屬吏懼公呼
教坊官至部語之日汝輩皆供事日久亦有年長曉
事者汝縱不計一身寧不為子孫地乎衆皆稱謝不
敢而心術之又西番僧法王佛子封號皆關禮部公

皆執奏以為狄教不足崇國制不可廢士論翕然稱
之然亦以此忤

旨中有密傳遂疏請致仕廷臣嘆公去言路者又合惜
章請留不報公既歸田杜門謝客不履郡縣闢園城
西樹花種木日與親舊詩酒為樂不言時事雖京師
知交亦不通書問凡西山名跡咸往遊焉乙亥四月
十四日以疾卒于正寢距生天順己卯六月二十七
日春秋五十有七而為其後者即榮女一適監生王
濟孫男三長訓早卒次詞次女孫二卜葬在丙子
三月傳家庄祖原之次公厚重質直準繩檢東厭浮

華寡嗜好內剛外和與人言侃侃無隱居鄉以孝友
稱守官清慎家無豐積尤愛助諸第一無怯惜厥第
曰璋曰瓚為之輸粟得散官曰琮曰珩為之輸粟為
國子生琮任縣丞珩任主簿公之平居中若無物遇
事則精核明審人不敢欺主考應天時外簾官有欲
見囑既知公不可移又畏權貴之勢乃欲委禍於公
公處之嚴毅慎密彼亦不能容其喙在禮部尤稱執法
當時士夫多倚為重辛未盜起畿甸時已命中貴偕
京營將士往討之迄無成功內言復欲易一中貴以
往詔廷議公抗聲曰前日遣者已無成功徒敝地方

若復再遣吾輩有死而已聽者竦懼為公危之公聲
色愈厲諸中貴雖惡公之直而心憚之卒之日棺槨
衾歛之具善自處公書籍詞翰之類皆封付諸第且
戒曰珪本無才德叨冒

書

朝廷大官清職實愧無寸補死後勿上疏乞察葬為重
吾罪後當道以斯言竟以聞于上乃賜祭葬如例當
公在翰林人俱知其文行修謹及至吏禮二部則剛
大之氣經濟之才鎮定之力翹見挺出至于進退死
生尤光明英偉求之古人亦不多得為文平正典雅
有北潭集八卷藏於家公沒已久雖舊獲恩典尚兵

壠蕭然儀文未備主事君余婿也追念其父乃述其
行實履歷并先今

朝廷贈加殊錫徵余言揭諸墓道嗚呼公逝矣身餘之
典沒父之命若有待焉者豈天厚斯人俾其猶獲報
耶公自少與余善且交親舊游相知素久故為銘銘
曰

清苑南陞古燕淳風山川明秀膏壤鬱葱傳氏宗子
占族厥中源流迤積鍾萃名公是為北潭懋振家聲
剛方警敏飭躬勵志少游郡庠英豪偉器力學攻苦
沉潛藻思連登甲第吉士殊科列職詞林從事編摩

累典文衡得人居多春宮諭德講筵展書清塵玉輅
仙步隨俱意氣深闕中有所主閑邪存誠厭圓就矩
金馬玉堂史局台輔宗伯邦禮少宰天部忤時遂歸
遁棲日優詩酒寄興烟霞興留五旬逾半一疾忽休
衆嗟其命獨報自天祭有于壇有墓于阡爰憶碩德
隆眷故臣少保加重賜謚維新錦製龍章輝昭後人
彼蒼有知覆盆有照揭此豐碑日月瞻眺訖立孤存
百齡永耀

太子太保禮部尚書贈少保謚文簡毛公行狀

無錫郡寶撰

公諱澄字憲清姓毛氏別號白齋晚更三江學者稱三江先生世居蘇州崑山之東隅弘治間割其地為太倉州遂為州人自考以上繼有善聞于鄉公生資性明粹神采秀朗容止端潔行步未嘗左右顧七歲善屬對間為詩歌傳播人口歲時與諸兄謁姻戚長老或贈以金錢歸即棄之曰要此何用吾不欲違其意故携歸耳陳武選愷聞而竒之許妻以甥年十七充太倉衛學生清苦力學每試有司輒入優等成化丙午中應天鄉試歸遘疾明年弘治戊申

丁父憂哀而盡禮服闋卒業胄監學思兼進德器聿成所作程文及擬古文凡若干首皆善体認而詞氣超脫然意不自滿悉取而焚之人或竊誦一二吳仲晚學傳以為式癸丑中禮部會試廷對賜及第第一人授翰林脩撰公感激奮勵益究心道德之蘊及禮樂名物之故精思實踐融會貫通涵養之久襟懷澹如隨所應接務合理道丙辰同考會試得人為多三載考績進階儒林郎贈考如公官封母太安人妻徐氏安人已未再考稱職克大明會典纂脩官庚申二月克經筵展書官是歲八月援例請告送太安人還鄉於是大父壽百歲中朝縉紳為賦咏以彰世德者

若干人有司為達人瑞坊壬戌赴闕癸亥三月會典成進
右春坊右諭德仍兼脩撰預脩通鑑纂要甲子二月充東
宮侍班官八月充東宮講讀官聲音精切義理明暢時武
宗為皇太子進講稱旨入言于孝廟曰今日講書毛先生
是蘇州人說書却正直明白孝廟甚喜方中秋說宴遂徹
以賜乙丑二月充經筵講官武宗登極推恩宮僚陞左春
坊左庶子兼翰林侍讀九月賜金帛束帶及上兩宮徽號
遂加贈考如公官加封母太宜人妻宜人是年脩孝宗實
錄充纂脩官正德丁卯正月聞太宜人疾請歸省不許計
至匍匐歸哀動里閭既葬避居北郊未嘗一入城府或為

郊行從一蒼頭過幽勝盤桓久之與鄉人處由由然絕去
邊幅及干以私則正色却為巨室有被誣者當道將奏沒
其產初求救於公弗許既而庶其罪不至此邂逅為直之
其人報以數百金公盡却去曰吾公道扶人安能以賄為
爾後耶其光明清介類此歲己巳逆瑾謂會典出內閣意
凡所陞秩悉奪之公亦落庶于止餘兼職是秋起復仍官
侍讀庚午陞侍講學士八月主順天鄉試九月署國子監
事辛未克殿試讀卷官尋陞學士克日講官壬申掌院事
奉命教庶吉士君子謂公言動可法不止文字之師甲戌
主考禮部會試尋陞吏部右侍郎乙亥陞左侍郎嘗署選

事人服其公丁丑正月三品一考進階通議大夫誥贈祖
考皆如公官祖母王及范太宜人徐宜人皆贈淑人廕子
希原為國子生六月陞禮部尚書侍經筵戊寅武廟南巡
公倡議諫上䟽凡數上期於必還兵部尚書彭公澤初為
左都御史嘗奉命制陝西邊事時土魯番侵軼踰密彭公
既處分奏行奸寧不悅忌彭者遂文致為罪將置重典於
是有集議之旨公言彭某有功無罪都給中事王爌石天
柱亦如公言彭遂從輕明日王石皆降外任或嗾寧撼公
公弗為動陰伺月餘無所得迺逆濠未反時奏欲令撫已
按諸臣朝服進見有請公奏行者公據故事條上濠居母

喪偽為孝行脅鎮巡請旗表公覆奏引孝經諸候之孝云
云謂今所上與此不同事皆得罷濠與其黨甚怨之公如
弗知也已卯春賜大紅蟒衣一襲玉帶一圍先是二品賜
玉者三人公與焉左右不悅公者匿弗予至是駕自西旋
將郊公當導駕度弗能終匿乃始出之庚辰會試充知貢
舉官五月尚書一考例有兼職左右有沮之者止加散官
贈祖考皆如公官祖母以下皆夫 逆濠既獲武宗駐蹕
通州朝制宗室有罪下諸王府議然後告廟行之左右言
濠多內應恐入京生變召文武群臣出會議公正色云前
有宸濠朕自有處置之旨必發書告廟一如舊制不宜在

外草草成獄奸彬在列為之吐舌自是法官執奏皆以公
言為據論者謂當是時郡奸竊柄且握重兵人人自危而
公議不少沮可以為朝廷重矣明年三月武宗崩慈壽皇
太后有旨往迎今上皇帝入繼大統公與使焉既得命兼
程以進比至有議行五拜三叩頭禮以見者公曰令遂如
此後何當以加之且將來勸進辭讓之禮行乎廢乎上聞
而是之賜采段十表裏白金千兩下及僕從皆有賚駕行
前後扈從備竭勤誠上每加慰勞既位即復念前勞賜白
金采段各若干又賜罪人家屬一人尋奉旨議興獻王主
祀稱號公會文武諸大臣議引漢成帝立定陶共王子為

皇太子立楚孝王孫景為定陶王奉祀共王事云云謂今
皇上既以興獻王長子入奉大統無他兄弟宜別立獻王
後以主祀事以興獻王親第九人倫序推之宜令益王第
二子崇仁王襲封興王繼獻王後奉承祭祀獻王長為一
國始祖萬世不毀稱號則引宋英宗以濮安懿王子繼仁
宗後程頤所論云云謂今興獻王於孝宗為弟於皇上為
本生父亦猶宋濮安懿王之于仁宗英宗皇上既入嗣太
宗宜稱孝宗為皇考改稱興獻王為皇叔父興獻大王興
獻王妃為皇叔母興獻大王妃凡遣官祭告興獻王及上
箋興獻王妃皇上俱自稱姪皇帝名隆重正統尊崇本生

無所不用其至可以為萬世法奏上有旨若曰事体重大
其再會議來奏公又議得興猷王宜令崇仁王暫以本爵
奉祀兼理府事俟山陵事畢及三宮尊號禮成再請會議
定奪興猷王稱號制皇帝于宗藩尊行止稱伯父自稱皇
帝而不名今皇上稱興猷王曰皇叔父曰大王又自請名
尊崇之典可謂至矣復備錄願文隨議以上有旨若曰還
博考前代典禮再會議務求至當來奏公復議臣等前
所引程頤濮議皇上稱興猷王為皇叔父興猷大王此孔
子所謂事之以禮者此外推尊之說稱親之議則似乎孟
子所謂非禮之禮孝子豈忍以加其親而忠臣豈忍以導

其君哉推尊之非莫詳于魏明帝之詔稱親之非莫詳于
顧之議前已錄上茲錄明帝詔文併乞賜覽有旨再顧議
議復議得先王制禮本乎人情人無子以兄弟之子為之
後為之後者謂其所後曰父而所生日伯叔父此皆人情
之所安曰人情安則天理得矣臣等不敢以他說進奏上
詔還再議既而內閣亦奏如公言有詔卿等委曲折中為
朕申篤孝之情云云公疏猶云禮可以義求而情不可以
言盡仰體聖心揆量事體使協乎情而無悖于義密勿謀
猷腹心忠愛非臣等有司所敢專旨有考據精詳議得處
停當之語繼奉慈壽皇太后懿旨稱號遂定主祭祀寢後

有奏於安陸州立祠祭署設丞二員以戚里子孫為之者
公復據前議執奏事皆詳具奏續是秋吏部尚書缺廷推
首屬公公固辭曰人豈不自知吾才豈堪此哉時秉筆者
左侍郎羅公欽順必欲推公公曰公同年豈不知我他日
僨事公亦與有責且喬司馬有何不可乃欲強我聲色俱
厲羅公知公意堅遂以喬公首薦公次之聞者嘉其退讓
山陵事畢再疏乞歸俱荷溫旨勉留明年春纂脩武宗實
充副總裁每朝罷入史局多所筆削出理部事日晏始歸
尊號禮成錄迎立功加太子太保廕子一人錦衣衛世襲
指揮同知五辭不允公亦不敢受尋奉昭聖皇太后懿旨


主選太婚得女子七人其一人為鎮劉撫某女故宦官某
族人也故中人多助給事中底蘊以告公稽武選貼黃而
信即具奏上俄有左順門議事之旨公意其此為騰貼黃
以進其事遂止冊禮行公克副使比終事賜綺幣者三公
素有脾疾及迎駕議禮精力繼疲至秋乃病常候早朝昏
眩移時及兼史事重以冢婦若孫之喪病遂日侵冬月益
甚䟽乞骸骨不允尋命醫調治及遣中使問以羊酒蔬米
明年正月以生還乞復不允仍命會試知貢舉官䟽三
上內閣擬命旨進上覽知愀然曰此輩老臣方切委任何
遽至此醫問如前比四䟽知不可起始許之加太子太傅

賜勅給驛遣其屬一人獲送還鄉命有司時加存問月給米四石歲給輿隸四人勅有朝苟康復墓即起用之語瀕行又遣中官致寶鈔為道里費公感激泣下謝表懇篤有餘忠焉既而治裝出都門會病少間朝紳餞者盈道人以為䟽傳復見行至興濟病作卒于舟中上聞之震悼輟視朝一日遣官諭祭者九命工部營葬贈少保謚文簡仍以迎扈功廕子一人為中書舍人公少時嘗夜讀母夫人遣女婢叩門送膏燭不應伯兄洪自起呼之乃出雖盛夏家人未嘗見其露体簡淡寡慾悉以世產讓其兄弟上賜金幣散諸宗黨故舊有差室無姬妾徐夫人沒三年始買一

婢及病厚遣歸其家公惟嗜詩亦頗喜飲每抱酒吟哦不
輟伺成章書之意格高古音律和平聞者聳聽疾病一二
過輟火之曰吾以適吾意而已平生言行無少偽犯而不
校遇事正直不以利害少屈然無韜晦故實浮於名位旣
通顯濟物薦賢恒如不及而未嘗自言其人或知而來謝
則日余忘之矣當正德時士風競進公獨絕口遷叙歲月
亦未嘗一造要人之門每語其子弟曰莫非命也彼不順
受何為者哉遇故人過從笑談終夕或酒酣頽然而卧若
不之有世間事者公在禮部久諸王府陳乞一裁以法上
在藩邸顧獨以此知公及奉迎歸聖眷遂深方將大用公

天下亦望公朝夕入輔而公歸且逝矣配夫人徐氏子男
一即希原女一適南京禮部主事王世芳孫男三與幾與
立與恭孫女一許聘金允若曾孫女一與幾先公一年卒
公卒癸未四月九日距公生天順庚辰八月二十二日春
秋六十有四希原將以卒之又明年正月一日塋公于鹽
鐵塘之原合徐夫人兆先期衰經杖走無錫以狀屬寶泣
而言曰先公與公道義相之幾三十年公先太夫人之銘
先公得狀於揚村舟中力疾起諾孰謂越三日而遂不起
乎言訖又泣若謂寶雖在喪有不可辭者寶遠朝省久矣
公之事不能備知然希原之情可念也乃受其手錄事實

略加次第為狀如右以備立言大君子采而書為謹狀



浙江圖書館

禮部尚書兼翰林院學士黃公行狀

李一瀚撰

公姓黃氏諱縮字宗賢別號久菴居士台之黃巖人也幼承祖文毅定軒公廢弱社即優通時義尤善古詩文一日因感橫渠先生論廕襲語遂棄舉子業師文肅謝公鐸教然以聖賢自期揭座右曰窮師孔孟達法伊周為監察御史陳公銓所知招應舉具書力辭不赴隱紫霄山中歷寒暑十餘年勤讀苦思學益充裕因母鮑太淑人強命出仕授後軍都事公素少治生術家甚窘有商人覬知餽金千餘兩公卻之且上疏革那移冒支弊盛為當道所重凡三

年疏乞養病歸田與王公守仁湛公若水訂終身盟講明
絕學共扶世教一意恬退儲公瓘喬公元禎咸以
台之先哲方正學稱之家居幾十年恭遇先帝龍飛詔徵
遺逸時侍御朱公節特疏薦公志專正道素行愜於輿情
心存王佐學術明於澤物起陞南京都察院經歷適大禮
議起公具疏與焉先帝用何淵議欲以獻帝入祀太廟舉
朝莫敢沮公特疏諫而寢繼上論聖學求良輔疏致忤時
相尋陞南京工部員外郎又累疏乞休歸田未幾尚書席
公書侍郎胡公世寧各疏薦公才堪大用學裕纂修起陞
光祿寺少卿纂修明倫大典時王公守仁江右功成忌者

議奪公力䟽辦之得明繼陞大理寺少卿首上論刑獄䟽
列六款又釋無辜囚辨寃枉獄不可勝數時稱明允先帝
以翰林缺官命選中外臣僚才德學識堪備儲輔者入翰
林時公膺首選改少詹事兼侍講學士充講官先帝嘗曰
爾以不羣之才卓越之見故超資寵用以圖治弘功大典
書成陞詹事仍兼侍讀學士其在史館事核理直無少阿
比同事者咸稱良史之才其在經筵日以養德格心求賢
才謹好尚為言先帝嘗以君子之言褒之陞南京禮部右
侍郎時各部院缺官公署五篆日歷諸曹一無廢事各屬
咸嘆以為難及帶管操江嚴防禦之法謹盤詰之司一時

江盜悉皆屏跡凡所應行奏為定例至今猶賴之三載考績陞禮部左侍郎適大同倡亂公奉勅往撫大同奮不顧身兼程到鎮運謀設策擒斬積年創亂首惡張王穆通等二百餘名而一方之難遂靖民立安輯祠祀之所餘賑濟銀三萬有奇毫無所蝕齋回還諸內帑先後功次國朝典故內雲中紀變篇載之詳矣惜乎尚未論其功也明年知乙未貢舉事甫畢適丁母憂服闋時有安南之亂先帝又起公禮部尚書兼翰林院學士克安南正使其區處事宜歷有章疏啓行間朝指權相賍私遂構令閑住歸抵家遷居翠屏山中杜門謝客日事註述布衣草履超然於塵埃

之外雖極寒暑手未嘗釋卷遠近有志士咸趨事之與語
終夕不倦凡有事閔民瘼者獨慨然言於當道凡有親故
貧乏者悉與賙給置立清獻杜公範墓山祭田擇其裔守
之買山遷葬文肅謝公鐸并與其諸孫貧無娶者聘之至
如撫養王公守仁遺孤其間事尤為難能所著有四書五
經原古明道編石龍集石龍奏議思古堂筆記家訓等書
享年七十有五卒於嘉靖三十有三年九月四日督學阮
公鶚以公德業昭著海內秩祀鄉賢公性資敦朴學問淵
宏具百折不回之操負獨立不負之勇究心聖賢之學惟
務執中率身仁義之猷克先孝弟立朝三十餘載風節凜

欽定四庫全書
禦居鄉一十六年懿行昭昭且以禮部臣建武功固為罕
由廕補歷上卿是誠異聞惜夫皇天不憖未寃厥施遂使
國無宗工鄉失模範迄今有遺憾也敢撫公平生之大槩
僭為行畧云

浙江圖書館

榮祿大夫少保兼太子太保禮部尚書翰林院學士
贈光祿大夫謚文通費公神道碑 分宜嚴嵩撰

江右仕族之盛其在廣信若鉛山之費少保兼太子太保
尚書大學士鵞湖公以倫魁至元輔歿謚文憲其從弟鍾
石公復以宮端翰學荐陟宗伯加少保兼太子太保終于
位天子賜以卹贈之典易名文通後先競爽慶鍾一門嗚
呼盛矣而考公之先積德深厚所由來者遠曾祖諱應麒
應麒生五子曰珣及瑞並發賢科曰瑄舉進士其二隱德
不仕而曰璠者文憲之考曰璵者公之考俱贈如子之官
時人擬之燕山五桂云公諱宋字子和幼嶷重如成人讀

書強記臨文屬對出人意料舉丁卯江西鄉試辛未會試
廷咸居高等選翰林庶吉士授編脩時逆濠陰蓄異志謀
復護衛文憲在位持不可公娶同郡婁郎中性之女濠妃
之妹也故有連濠屢以意屬公公外遜色詞而實陰折之
濠因切齒賂中貴出內批勒文憲與公皆致仕乃益毒敷
于公家門戶幾不保濠敗今上皇帝入正大統薦者誦言
公等守正被禍詔起文憲及俱還原職公入侍講筵預脩
武宗實錄成陞春坊贊善尋陞南京尚寶卿改春坊庶子
兼侍講掌南京翰林院事陞南京通政改南京國子祭酒
文憲再召未入京祭酒缺朝議將移公補之公以嫌辭陞

南京禮部右侍郎改南京吏部右侍郎蓋公六轉居南既
十載餘矣於是召為兵部左侍郎上念公舊講臣兵貳非
宜適翰林員缺內閣以公請改禮部左侍郎兼翰林學士
掌院事又命公署國子監事乃拜禮部尚書仍兼學士既
掌詹事府事甲辰廷試充讀卷官是年秋禮部缺尚書遂
命公管部事太廟成加太子少保丁未加太子太保賜飛
魚服數奉召入西內賜直廬其他服采金幣之賜不可勝
紀戊申八月加少保蓋是時公受上殊眷即有爰立之命
而是歲十二月之十三日公忽遘疾以卒論者惜焉上聞
而問曰案得何疾猶以撰文金幣追賜其家公之在翰林

也以經術勸讀色溫氣和規益婉切為同列所稱服為文
章平正雅暢詞采溢發於凡應制之作無不克稱上意識
達政体居南雍嘗陳六事居伯以地震陳八事悉見允行
與人交和厚易直推賢讓善人樂親之公生成化癸卯二
月距卒享年六十有六元配婁氏繼吳氏俱贈夫人子男
五長懋學以廩授左府都事陞後府經歷調詹事府主簿
次懋升懋謙同壽有壽女三適太學生詹翔驚餘幼懋學
卜以某年月日葬于某山之原而拜泣請墓碑憶在正德
丁卯之歲予為編脩公計偕來京以文憲之意來訪于予
公時妙齡秀發德器粹溫予固深重之其後予掌南部公

任翰林居相連也出入時接軫相得甚懽逮今凡四十年
同時交舊鮮有存者宜懋學之有請於予也然公歷官行
事之美與夫宸眷寵賜之隆顧又不可勝書書其大節亦
足以槩公平生而傳信後世也已系之銘曰繫費之先由
蜀來遷于信之鉛兮爰家橫木世載德音發溥洪深兮倫
魁上公位致顯庸碩大以崇芳逆藩猖狂扈跋鴟張疇托
其吭兮大義獨時罔恤爾私屢蹈于危兮迺遘昌辰皇運
維新旣誄而信兮經幄論思成均作師全聞以馳兮颺歷
兩都春卿贊謨荐加三孤兮顯顯德門萃美弟昆莫之與
倫兮皇眷特殊期秉政樞昌不少須兮有位有年有嗣而

賢是澤之延兮佳丘孔安豐碑桓桓名以不刊兮



浙江圖書館

資善大夫禮部尚書兼翰林院學士贈太子少保謚

文莊歐陽公神道碑

華亭徐階撰

公諱德字崇一別號南野舉嘉靖癸未進士授六安州知
州遷刑部員外郎會上選士大夫之有文行者以置翰林
改編脩仍其服色俸給踰年遷南京國子司業南京尚寶
卿遷太僕寺少卿以親在南不樂也當軸者知其意奏以
為南京鴻臚卿丁父憂服除留養其母蕭宜人以為復為
南京鴻臚將為疏乞終養母不許遂奉以行未至遷南京
太常卿尋召為太常卿掌祭酒事入白其母母遽曰吾幸
無恙當與兒俱往矣至則遷禮部左侍郎上雅知公熟儀

禮孝烈皇后葬遣監護諸司改吏部左侍郎兼翰林院學士掌詹事府事充會典副總裁教庶吉士遣代拜先聖先師遣陪祀帝社稷主考庚戌會試皆儒臣所謂榮其夏以三品考績贈祖時勉父庸如其官祖母某為淑人封母太淑人踰月母卒賜祭葬嘉靖壬子春三月持服未終召拜禮部尚書兼翰林院學士冬召直無逸時時同勲輔諸臣奉賜劄與聞大政中外咸慶喜以為且爰文又明年甲寅三月二十一日得疾卒距生弘治丙辰五月二日享年五十九訃聞上震悼贈太子少保謚文莊賜祭二壇命工部治葬事又蔭其弟昱為國子生而士大夫則相與咨嗟涕

澆奮然失其所望嗚呼是可以觀公之槩矣初公領鄉薦
陽明先生倡道于虔之行臺其說以為人心虛靈萬里畢
具惟不蔽於欲使常廓然以公湛然以寢則順應感通之
妙自出乎其中而古儒徃徃索諸口耳其力愈難其於用
愈窒非大學致知之本指於是舉孟子所謂良知者合之
大學曰致良知蓋明明德之別名耳而士溺於舊聞譁以
為禪公獨曰此正學也走受業於先生凡再不赴春宮精
思力踐日有所自得比入官則遂以其學施諸政事知六
安時為二籍稽公使錢及其俸錢之出納曰非以為名吾
屬所自檢坊固當如是歲侵損俸之半以倡吏民得粟若

千石隨所在作粥食饑者活數萬已乃為人興水利汰冗
後定經費省訟獄之追呼罷諸苛法作龍津書院進諸生
教之間學民士咸附為編修奉詔議郊禮部悉指陳禮家
說之同異終之曰禮文乖錯未可盡據而土木一興財費
不貲惟益修勤民之政上當於天心則異郊可也同郊亦
可也於丘可也於屋亦可也時服其遠識在南京國子故
事司業當課其諸生為文詞公因引之於道作講停進四
方來學者與諸生講論其間或以疑質為稽之經訓證之
事物本之人情叅之世變誥之使自識其迷謬徐而論之
使得其心之所安公固善論說而誠意懇篤氣象平易士

以是日親及侍太淑人居于家益與夔江聶公東廓鄒公
念菴羅公以講學為事學者自遠而至當是時士咸知誦
致良知之說而稱南野門人者半天下雖陽月無以加也
奉命教庶吉士歎曰此朝廷所厚養以需大用者不宜徒
以文為也教之如國子而繼之以時政之所急聞者莫不
興起為禮書首請建儲不報會詔二王同出府而婚以上
疏曰昔我太祖以父婚子諸王皆慶禁中至孝宗以兄婚
弟諸王乃皆出府今事與太祖時同宜如初制又引醮命
詞有承宗承家之說請賜裁定上知公意命分別成婚矣
既而降諭寢之然婚亦竟不同日裕王母康妃薨公具喪

儀援憲廟淑妃例為請詔準鄭賢妃淑者孝宗之母賢妃者上之諸妃附塋孝潔皇后墓側者也公乃損益二儀行之而特建墳園奉康妃以葬秦府為其中尉女請封公曰祖訓郡王孫六世以下世授國中尉女則封號止於魯奉玄蓋子女厚薄之差如此今將軍尉分封曰中繁常賦不能給勢不得復於祖制所畧隆其恩禮䟽請斷自五世以不授宗女宗捐之號給冠服婚資而聽其自便崇陽王以罪賜死例不得襲又郡王絕嗣者與親王異城則襲否則使將軍中尉一人以其官奉祀而崇陽子援他郡王例乞襲封公曰事當慎如此一府封諸府之乞封者且踵至民

不堪矣且言不當封狀請下諸藩禁毋妄有所乞宗室以
罪降為庶人者例計口給食雖名苦之其所入乃更多於
中尉故恒輕犯法而擅婚花生雖禁之不止公曰此利養
厚耳為裁定其數率比中尉減三之一上皆從之天下有
陰受公之賜而不自知者弋陽建安樂安諸王爭攝寧府
事嗾其宗人相公訐以幸已得公曰寧既已國除復有府
事須攝耶請令各治其府而故郡王之以罪除國者其宗
人各以世系分屬之爭遂息公自始仕至宗伯凡更十一
官每遇事衆相顧未有慶或計利害震動失色公莫不立
應而意氣閒暇如無事時或問公所以能此者公曰吾惟

求諸心心知其為是即毅然行之雖害有不顧如之其非
雖利不敢為此吾所受於吾師而自致其良知者也居家
孝友數撙節衣食以周其族凡賴以婚葬者若干人置社
倉於鄉集子弟教以禮義又為立保伍法使相救助後歲
凶其鄉人果得免於流徙劫掠之患故公之講學士翕然
從之者以其修諸身施諸事能無愧於其言也公先世長
沙人三徙而居秦和之蜀鄉詳見予所為巖溪翁碑子男
二餘慶詹補國子生紹慶江西壬子鄉試第二人俱配康
淑人出女一許嫁敦太守平川次子某側室蕭出孫男三
宗符宗翰宗發女三尚幼餘慶等卜以丙辰某月某日葬

公於某山之原奉公高第子工部侍郎弟雷公狀請予銘
其神道之碑予昔與公同舉進士公時已稱名德而予纔
弱冠於道未有聞公朝夕與予論學所以啓迪夾持者甚
至及予佐吏部念公不可使一日不立於朝因薦公用之
後遂同總裁會典相繼教庶吉士於翰林論議志意無一
不相協予自禮書入內閣公又實代予而公之未至予攝
篆以俟者七月所以慶二王之間與夫社宗室之妄請予
蓋開其端而公能發明克廣予所未及由是相得益深公
於當世之務無不究心其言之無不有條緒以予淺薄獲
從輔臣之末方期典公相左右庶幾少有建立而公遽已


卒予凡三哭之慟其與人語及公輒嗚咽不能勝者不知其幾也然則銘公而因以抒死生之感予固不得辭也夫銘曰大江之西多名臣文章事業傾朝紳心學發聞自公身曰孔有軌吾所循先於治已推之人寂感順應虛乃神公學以心非脛脣深造實踐功力純良知瑩然燭無垠歷官中外名孔振推帝如公文益真召典三禮承咨詢諄謨至計日敷陳潛植國本亨時屯喁喁海內延頸頻幸公旦夕持衡鈞道誰尼之弗盡伸星斗晦翳江漢堙無能起公百感臻我涕一日三沾巾推本學術刻貞珉千載神

嶙峋公則逝矣光流新以此塞悲悲孰倫嗚呼以此


塞悲

悲孰倫

非心孰能



浙江圖書館



浙江圖書館



浙江圖書館

浙江圖書館善本

甲 登記號：006663

一九 年 月 日



浙江圖書館

colorchecker CLASSIC



xrite



